





Neu ar faes y gâd yn Fietnam. Gallai Cayo bron ag anadlu'r Napalm yn ei ffroenau. Arogl buddugoliaeth....!



Tra'n breuddwydio tynnodd Cayo'r pin allan o'r *grenade* a'i daflu....



Ond, arswyd y byd, rhedodd ei gi ar ôl y *grenade*,
9 eiliad...
8 eiliad ...




Yna cododd y *grenade* i'w geg, a gwelodd ei feistr
7 eiliad ...
6 eiliad ...




A rhedodd yn ôl tuag ato.
5 eiliad...
4 eiliad ...



Roedd yn rhaid i Cayo wneud penderfyniad cloi. Ai ceisio achub ei groen neu ei gi.
3 eiliad ...
2 eiliad ...



Rhedodd y Kommandante am ei fywyd.
1 eiliad ...
0 eiliad...
Kerboom!
Ffrwydrodd y ci o Abergwesyn i ebergofaint.



Ac aeth y ci i'r wlad lle mae pawb yn rhydd



Cynhaliwyd cynhebrwng i'w compadre gan yr FWA yn yr Angel; cyfaill a gollwyd yn y frwydr barhaol yn erbyn y gelyn ...

...wnes i ddim dweud wrtho faint o'n i'n ei garu...





天下興亡
匹夫有責

Deng Xiaoping

Mwy o comebacks na Dafydd Iwan.



Deng Xiaoping sy'n 92 mlwydd oed eleni yw arweinydd swyddogol China. Ar yr un llaw y dyn oedd yn gyfrifol am y 'wyrth economaidd' yn China, ac ar y llaw arall y dyn wnaeth anfon y tanciau mewn i Sgwar Tianamen. Bob tro byddai Mao Tse Tung yn hyderus. byddai'n carcharu Deng. Bob tro byddai mewn trwbwl, byddai'n ei rhyddhau i gael ei help i redeg y wlad.... Deng Xiaoping - mwy o comebacks na Dafydd Iwan.

Wedi ei eni mewn i deulu cefnog, wedi astudio dramor yn Ffrainc yn ystod y 1920'au, ac wedi ymuno â Mao yn ei wersyll yn Jiangxi yn 1930, roedd gyrfa ddisglair o flaen Deng o fewn Plaid Gomiwnyddol China. Cymrodd ran yn yr Orymdaith Hir i Shaanxi yn 1934-35, a bu'n brwydro yn erbyn lluoedd Chiang Kai Chek cyn cael ei ddirchafu i Bwyllgor Canolog y Blaid Gomiwnyddol yn 1945

Roedd yn un o ffeffrynau Mao ar y dechrau: yn ddirprwy arweinydd yn 1954, ac yn ysgrifennydd cyffredinol y Blaid rhwng 1956 ac 1966. Ond pragmatydd oedd Deng. Roedd yn gwrthwynebu syniadau 'The Great Leap Forward' Mao pan orfodwyd y Chineaid i doddi popeth metel oedd ganddyn nhw, gan gynnwys sospeni etc er mwyn i China ddod yn wlad ddiwydiannol. a phan fu farw miliynau o Chineaid o newyn oherwydd polisiau amaethyddol Mao. Ymosodwyd arno felly yn ystod y Chwyldro Diwylliannol, a 'dflannodd' rhwng 1967 ac 1969.

Y comeback cyntaf - dan orchymyn Zhou Enlai daeth Deng yn ddirprwy arweinydd eto yn 1973. Pan fu farw Zhou yn 1976 aeth y Gang o Bedwar ati i 'gael gwared' ar Deng eto.


Yr ail comeback - Rhoddodd Hua Guofeng ei swydd yn ôl iddo yn 1977, ac yn ddiweddarach daeth Deng i gymryd lle Hua fel arweinydd.

Comeback rhif tri - China aeth Deng ati i newid China gan gyflwyno'r farchnad rydd i'r wlad a cheisio denu buddsoddwyr tramor. Doedd e ddim yn ffafrio newid gwleidyddol serch hynny, ac roedd am weld y Blaid Gomiwnyddol yn dal gafael llwyr ar y wlad.

Ef oedd yn gyfrifol am orchymyn y lladdfa gwaedlyd yn Sgwar Tianemen yn 1989. Er ei fo wedi ymddiswyddo o bob swydd, mae'n dal yn reolwr swyddogol ar China. Mae'n amheus erbyn hyn os mai dim ond ei *wheelo mas* ar gyfer digwyddiadau swyddogol mae'r Chineaid yn gwneud erbyn hyn.

Ei hoff sloganau? ...


'To grow rich is glorious'
'Execution is part of education'



Bob Paisley gyda'r tim ieuenctid!



Sgwâr Tianamen - tanco!



OASIS v SUPER FURRY ANIMALS?



Howard Marks


Derbyniodd Seren Tan Gwmwl alwad ffôn syfrdanol heddiw wrth berson oedd yn honni i fod yn reolwr ar un o'r bandiau roc mwyaf yn Ewrop - *Oasis*. Yn ôl y 'rheolwr', teimlad y band, ac yn arbennig y prif ganwr a'r golffwr rhyngwladol talentog Bernard Gallagher oedd eu bod wedi cael digon o lwyddiant, cyffuriau, *Rolls-Royces* a menywod i bara oes. O ganlyniad bu'r brodyr Gallagher ar gwrs WLPAN yn Llambod; gwelsant y goleuni. Maen nhw'n bwriadu trefnu taith fawreddog gan ddechrau gyda Cross Hands, Penuwch a Hermon.



Liam Gallagher

'Maen nhw ond yn byw 50 milltir o'r ffin ta beth', dywedodd eu rheolwr (honedig), 'ac maent yn ystyried eu hunain yn *Gymry* beth bynnag, ac eisiau canu yn eu mamiaith'. Aeth ymlaen i ddweud ...

'Teimlai'r band nad oedd canu yn Saesneg yn unig yn ddigon o her iddyn nhw, a bod y sin roc mor static a diflas, fel nad oedd cyfle iddyn nhw ehangu eu doniau yn llawn ac arbrofi.'



Neithiwr doedd *Catania* na'r *Super Furry Animals* ddim ar gael i gynnig sylwadau ar y gystadleuaeth newydd fydd yn eu hwynebu o fewn y sin roc *Gymraeg*!!

Nero yr hero ...!



Nero - neu Lucius Domitius Ahenobarbus - tipyn o *hero*. Daeth yn Ymerawdwr Rhufain yn 17 mlwydd oed, yn y flwyddyn 53 yn dilyn marwolaeth Claudius. Yn y flwyddyn 59 trefnodd i'w fam gael ei llofruddio oherwydd ei bod yn beirniadu ei gariad, Poppaea Sabina. Yn ddiweddarach lladdodd Sabina.

Yn 64 llosgodd dwy ran o dair o Rufain. Yn dilyn methiant mewn cyfres o ryfeloedd cafwyd gwrthryfel yn erbyn Nero; ffodd o Rufain, ac yn y flwyddyn 68 lladdodd ei hun.




Boring But True ...

- 1 - roedd Nero yn blentyn amddifad.
- 2 - roedd gan ei wraig 500 asyn i gadw ei bath yn llawn llaeth drwy'r amser.
- 3 - roedd Nero yn bwyta cennin i wella ei lais canu.
- 4 - mae'n amhosib i Nero fod wedi *'ffidlo tra bod Rhufain yn llosgi'* - doedd y violin ddim wedi cael ei ddyfeisio bryd hynny.
- 5 - bu'n cystaldu fel athletwr yn yr Olympics yn 60 o.c. gan ennill pob cystadleuaeth wnaeth e' gystadlu ynddyn nhw - er ei fod yn athletwr gwael!

Robert de Niro
'ges i'n enwi
ar ei ôl ef

Gemau Olympaidd yn dod i Geredigion!!



Cafwyd cyhoeddiad syfrdanol heddiw wrth bwyllgor y Gemau Olympaidd, pan wnaethon nhw ddatgan y byddai Gemau Olympaidd 2004 yn mynd i weriniaeth fach gwbl annibynnol yng ngorllewin gwlad fach arall (sydd ddim yn annibynnol) - enw'r Weriniaeth yw Ceredigionaberteifi. Mae'n wlad sy'n cael ei hystyried yn un drydydd byd, yn llawn amaethwyr a gyrrwyr tractors, ffanatics *whist drive* a beirdd.



P. Rees Edwards

Urdd - asol!

Gwnaed y cyhoeddiad rhyw dair awr yn ôl mewn neuadd farchnad lawn yn Llanybydder, gan un o'r rhai fu'n rhan o'r tim ymgyrchu yng Ngheredigion - P. Rees Edwards. Mae'r logo eisioes yn barod - llun gan Kyffin Williams o dolphin yn nofio mewn môr yn llawn caniau coke, papurau mars bars, condoms, carffosiaeth, cartons gwag ac olew. Serch hynny pan ofynwyd i Mr. Edwards pwy fyddai prif noddwyr y gemau, dywedodd mai Coca Cola, Mars, Durex a plumber o Dalgarreg o'r enw Eddie Jenkins.

Bydd gwisg swyddogol y Gemau'n cael ei noddi gan *Cheap Charlies* o Aberystwyth, a bydd yn cynnwys jeans wedi ffado, sneakers, crys check du a choch, a siwmpwr *pringle* ar gyfer diwrnodau cymylog.

Mae'r prif safleoedd eisioes yn barod. Bydd y bocsiio yn digwydd yn Sgwar Finch Aberteifi rhwng 1 a 3 o'r gloch y bore (dydd Sul), gyda rowndiau rhagbrofol yn nhafarndai'r dre yn hwyr ar Nos Sadwrn. Ar gyfer y cystadleuthau nofio mae'r gemau wedi bod yn ddigon ffodus i gael yr hawl i ddefnyddio pwll nofio Ysgol Aberaeron, cyn belled â bod y cyhoedd a phlant ysgol yn cael blaenoriaeth.



Billy Rees ar y blaen yng nghystaldeuaeth 'cicio'r cach mas o Billy Rees'

Fel sy'n arferol gyda'r gemau Olympaidd, cafodd Cereideigionaberteifi'r hawl i ddewis un gem eu hunain, wedi meddwl yn ddwys, gwrthodwyd y syniad o rasio cwrwgl, cneifio defaid, pool, darts a dringo coed, ac yn hytrach dewisiodd y pwyllgor yr hen grefft draddodiadol o *bwyso un llaw ar wal, tra'n dal kebab yn y llall, a cheisio pisho'ch enw ar y wal ar ôl yfed pymtheg peint o lager*. Cwynodd rhai gwledydd bod hyn yn rhoi mantais anheg i wledydd y Gorllewin - un o'r rhai wnaeth ddatgan na fyddai'n ceisio pisho ei enw oedd Zhugyanov Ilych Potronosky o Rwsia.



Mr Cynog Dafis
Aelod Seneddol y Blaid Werdd



Bydd y pentref Olympaidd yn ardal Gorbals-Penparcau o Aberystwyth. Dywedodd Mr Edwards:

'Fydd y bobl leol ddim yn amharu arnom ni. Gallwn eu defnyddio fel ymarfer ar gyfer y gystadleuaeth saethu. Mae'r rhan fwyaf ohonyn nhw'n ddiwaith beth bynnag, efallai y bydd yn dod â rhyw fath o gyffro i w bywydau yn lle hwrw'r Temazepam drwy'r dydd.'

Croesawyd y newydd gan Mr. Cynog Dafis, yr Aelod Seneddol Plaid Cymru lleol gan y byddai'n dod â swyddi i'r ardal, yn hybu'r economi, ac yn fodd o ddangos yr Iaith Gymraeg i'r byd.



Mr Cynog Dafis
Aelod Seneddol Plaid Cymru

Serch hynny, doedd yr Aelod Seneddol gyda'r Blaid Werdd yn yr ardal, Mr. Cynog Dafis, ddim mor siwr. *'Bydd hwn yn drychineb ecolegol. This will be an ecological disaster. Gwallgofrwydd llwyr - pobl yn crwydro o gwmpas yn dinistrio cefn gwlad. Sheer madness - all these people roaming about destroying the countryside,'* dywedodd / he said.